

Was merr su babbelt

Wo issen moin Kuuchelschreiwere?

Was suchsde?

Moin Kuuchelschreiwere, wo issen der?

Der leit doch immer uff de Fensterbonk.

Doo leit er awwer nitt.

Dann waaß ich nitt wo er iss.

Host dun villeischd gehabbd?

Ich habb moin eichene Kuuchelschreiwere.

Den hosde villeischd nitt gefunne unn doo hosde ...

Isch habb gar nix. Seit wann suchsden den?

Heit moie hadd isch enn noch. Unn jetzt isser fort.

Ich waaß nitt wo du doi Zeich hieleesche dust.

Ich leeschen immer, immer! uff die Fensderbonk.

Du host disch vorhin umgezooche, villeischd leider im Bad?

Doo isser nitt, isch habb schunn geguggd.

Du host vorhin e frisch Hemd ogezooche, doo werrder ...

Klar, der stickt bestimmt im Hemd von heit moie.

Awwer du leeschsden joo immer, immer! uff die Fensderbonk.

Doo habb isch dess oomol, heersde, oomol! vergesse.

Dann gieh in de Keller, dess Hemd iss in de Wäschmoon.

Deesden merrn grad emol holle? – ich muss doch fort.

Isch gieh suwiesu in de Keller, ich breng derrn mett.

Hosden gefunne? Warer werkllich noch im Hemd?

Ja - unn nitt nor de Kuuchelschreiwere.

Dann hosde aach moin Zeddel aus de Hemdedasch, danke.

Warum versteggelsde eischendlich immer die Zeddel?

Ich versteggel die doch nitt. Doo stiehn moi Termine druff.

Aha, zum Beispiel mett de Susi. Hier stieht: Susi J!

Ich erklär derrs späder, jetzt habb isch koo Zeit mieh deferr.

Awwer ferr die Susi J! – mett Ausrufezeiche: Susi Jott!

Dess kann doch nor e lieb Fraasche soi, moonsde dess?

Ich moon gar nix, isch will nor was erklärt hawwe.

Isch muss fort.

Suvill Zeit werrsd noch hawwe, um merr dess ze erklärn.

Also gut: Susi J! heeßt: Sitzung um Siwwe im Joffche.

Unn dess Ausrufezeiche?

Nitt vergesse heeßt dess.

Oons verstieh ich nitt: Woher waaßden dasses Siwwe heeßt?

Weil ich dess im Kobb habb.

Es kennt aach Sechs haaße, odder nitt?

Fraa, schäm Dich. Außerdem muss ich jetzt fort.

Warum sollen isch misch schäme?

Weil isch muss um Siwwe ins Joffche unn du host nor Sechs im Kobb.

Eiern Honnes